



17. august 2012

UKA2012/139

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Siunissami piginnaaneqarnerulernissaq linjefaginilu minnerunngitsumik matematikimi, tuluttoornermi, fysik/kemimi naturfagimilu atuartitsisalernissamut periarfissat annertusarniarlugit Meeqqat atuarianni ilinniartitsisut ilinniaqqinnissaminnut piginnaanngorsaqqinnissaminnullu atatillugu pitsaanagerusunik periarfissaqarnissaat pillugu nalunaarusiornissamut Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Andreas Uldum, Demokraatit)

Tunnngavilersuut

Demokraatinut pingaaruteqarpoq meerartatta ilikkagaqartarnissaat atuaraangamik. Aamma soorunami ilikkagaqarluarnerussapput atuartitsisoq ilinniarluarsimasuuppat ilinniartitsilluarsinnaallunilu.

Isertorneqassanngilaq ilinniartitsisoqarniarnermi massakkorpiaq pissutsit naammaginangimmata. Akulikippallaaqaq arlaannik pissuteqartumik meeqqat naammattunik piginnaaneqanngitsunik atuartinneqartarnerat.

Ilinniartitsisut kattuffiata IMAK-p nammineq arlaleriarluni ajornartorsiut tamanna tikkuartarpaa. 2010-mi Aningaasarsiorneq pillugu nalunaarummut atatillugu peqatigiiffik tusarniaanermut atatillugu akissummini ilaatigut allappoq:

”Taamaammat IMAK’ip kaammattuutigissavaa atuariiit fagini atuartitsisunik sammisatigut piginnaasaqartunik ingerlatsinissartik eqqumaffiginerulertariaqaraat atornissaallu salliutittalissallugu. IMAK isumaqarpoq, atuartitsinerup pitsaassusaa qaffasinnerulissappat angusallu pitsaanerulerlutik, taava pisariaqarpoq sapinnigsamik fagini liniefaginut ilinniarsimasut imaluunniit ilinniartitsisut allatut piginnaanngorsarsimasut fagini iliniartitsisusassasut”.

Nalunaarummi tassani IMA ima aamma allappoq:

”Taamaattumik IMAK-p innersuussutigissavaa, ilinniartitsisut atorfeqareersut amerlanerusunik liniefaginut piginnaanngorsartarnissaat neqeroorutigineqartariaqartoq imaluunniit allatut piginnaanngorsartoqarsinnaasariaqartoq”

IMAK –p ilaatigut misissuineq alla innersuussutigaa, takutitsisoq, ilinniartitsisut 16 procentiinnaat linjefagitut ilinniarfigisimasatik ilinniartitsissutigisaraat. Paarlattuanik ilinniartitsisut 18 procentii akipput oqarlutik, linjefagitut ilinniarfigisimasatik ilinniartitsissutiginnngisaannarlugit. 36 procentit akipput, linjefagit ilinniarfigisimasamik affaannaat atuartitsissutigisarlugit kiisalu aamma 27 procentit akipput, fagit ilinniartitsissutigisartakkamik affaat linjefagitut ilinniarfiginikuusimagitik.

Misissuinerup pineqartup takutippaa ilinniartitsisut 87 procentii isumaqartut, fagimi ataatsimi amerlanerusuniluunniit ilinniaqqittariaqaraluarlutik.

Misissuineq paatsuugassaangilaq Demokraatinilu qularinngilarput ilinniartitsisut ilinniaqqinniarlutik piginnaangorsaqqinniarlutilluunniit kissaataasa tapersersornissaat pingaaruteqartoq. Atuartitsineq pitsaanerulissaaq meerartattalu ilikkagaqarluarnerunissaat tunngavissineqassaaq.

Demokraatini isumaqarpugut aallaqqaammut fagit matematik, tuluttoorneq, fysik/kemi aamma naturfagi suliniarfisariaqartut, fagit taakku atuartut siunissami ilinniaqqinnissaannut atorfeqalernissaannullu immikkut pingaaruteqarmata.

Pisortanut aningaasatigut allaffissornikkullu kingunissai

Aallaqqaammut siunnersuutiginerup nassuiaasiornissap suliarinerata aningaasartuuteqarfiginissaa naatsorsuutigineqassaaq. Tassanili aningaasartuutit killeqarnissaat killeqartussaammat, Ilinniartitaanermut Iisimatusarnermullu Pisorta qarfiup missingersuutaanit pioreersumit akilerneqartariaqarpoq. Nassuiaammi naatsorsuutigisariaqarpoq tikkuarneqarumaartoq, ilinniartitsisunik ilinniartitseqqinnermi piginnaangorsaaqqinnermilu periarfissat suut naleqqusarneqartariaqassanersut suliniullu qanoq akeqassanersoq.

Naatsorsuutigisariaqarpoq nassuiaatip tassanilu inersuussutigineqartut atortussanngortinnerisa kinguneranik ilinniartitsisut ilinniaqqittarnissaannut piginnaangorsaqqittarnissaannullu aningaasartuutit amerliumaartut.

Qanorlu aningaasartuuteqartoqarumaarnersoq oqaatigiuminaappoq. Tassungali atatillugu oqaatigineqassaaq Inerisaaviup Ilinniarfissuaq suleqatigalugu pilersaarutigimmagu ilinniartitsisunik pikkorissaasarnissaq ilinniartitseqqittarnissarlu. Taamaattumik imaassinnaavoq aningaasanut tunngasortaa "inissereersimassasoq".

Tamatumunnga atatillugu pissusissamisoorpoq Naalakkersuisut peqqussallugit, suliami pineqartumi ilinniartitseqqittarnissaq pingaartissagaat, meeqqat aturfiani atuartunut iluaqusiisumik piginnaasat qaffattussanngorlugit.

Namminersorlutik Inuutissarsiortunut aningaasatigut allaffissornikkullu kingunissai

Siunnersuutip pivisunngortinneqanera namminersorlutik inuutissarsiortunut aningaasatigut allaffissornikkullu kinguneqarnerlunnaviangilaq.

Innuttaasunut aningaasatigut allaffissornikkullu kingunissai

Siunnersuut imatut toqqaannartumik innuttaasunut aningaasatigut kinguneqartussaangilaq, siunnersuutilli nassatarisariaqarpaa, innuttaasut atuartuutilli misigissammasuk, atuartuutitik pitsaanerumik qaffasinnerusumillu atuartinneqartalersut.